

**PERUTUSAN YANG BERHORMAT MENTERI KEBUDAYAAN, BELIA DAN SUKAN
SEMPENA HARI ANTARABANGSA ORANG KELAINAN UPAYA 2025**

1. Pada 3 Disember tahun ini, Negara Brunei Darussalam dan negara-negara ahli Pertubuhan Bangsa-Bangsa Bersatu (PBB) meraikan **Sambutan Hari Antarabangsa Orang Kelainan Upaya (*International Day of Disabled Persons*) Kali ke-32**, dengan tema “***Fostering Disability Inclusive Societies for Advancing Social Progress***” atau “**Memupuk Masyarakat Berkelainan Upaya yang Inklusif ke arah Kemajuan Sosial**”.
2. Tema ini selaras dengan **Pelan Tindakan Orang Kelainan Upaya (OKU) di bawah Majlis Kebangsaan Isu Sosial** yang menekankan membina persekitaran serta ekosistem yang inklusif bagi golongan OKU seperti infrastruktur, prasarana dan komunikasi yang mesra-OKU, pengamalan anti-diskriminasi di tempat-tempat awam; dan juga pembangunan serta pengemaskinian dasar-dasar yang mengambilkira suara OKU.
3. Sejak penguatkuasaan **Perintah Orang Kelainan Upaya** pada **1 Oktober 2021**, seramai **5,443** OKU telah mendaftar dalam Pendaftaran Kebangsaan OKU. Manakala, seramai **7,615 orang** menerima Elaun Kurang Upaya (EKU), termasuk **1,195 orang** menerima dua faedah iaitu Pencen Umur Tua dan Elaun Kurang Upaya. Selain itu, **3,164 orang** juga menerima **Elaun Penyediaan Penjagaan (EPP)**, iaitu bantuan khas kepada penjaga OKU.
4. Alhamdulillah, Negara Brunei Darussalam, melalui usaha secara *whole-of-nation* sentiasa aktif menekankan kepentingan untuk melindungi dan memperjuangkan hak OKU. Antara inisiatif dan pencapaian tahun ini:
 - a) Penubuhan sebuah **Task Force Pelekat Kenderaan OKU**, yang dipengerusikan bersama oleh Kementerian Pengangkutan dan Infokomunikasi dan Kementerian Kebudayaan, Belia dan Sukan, bagi meneliti tatacara penguatkuasaan penggunaan letak kereta OKU, kearah memperkukuh aksesibiliti dan melindungi hak OKU.
 - b) **Pengeluaran Siri Wang Kertas Keluaran Baharu Brunei Darussalam** yang akan diedarkan mulai 2026, oleh **Brunei Darussalam Central Bank (BDCB)**, yang menampilkan ciri **DOMINO™** berupa titik timbul untuk membantu OKU penglihatan mengenal pasti denominasi, yang dibangunkan dengan kerjasama **Brunei Darussalam National Association of the Blind (BNAB)** sebagai usaha negara meningkatkan akses pembayaran untuk semua.
 - c) Dalam bidang pendidikan, setakat September 2025, seramai **3,180 orang pelajar berkeperluan khas** berdaftar di institusi kerajaan, dari peringkat pra hingga tingkatan enam. Kementerian Pendidikan juga memperluas peluang penyertaan pelajar OKU melalui pelbagai aktiviti tahunan seperti pertandingan hafazan, kolaj, nyanyian solo, pakaian tradisional dan etnik puak Brunei, serta penganjuran Program Bootcamp Rendah dan Menengah.
 - d) **Pendidikan Khas Ugama** turut mencatat kemajuan ketara melalui penyelarasan kurikulum serta penyediaan bahan pembelajaran adaptif merangkumi modul ibadah, literasi Jawi dan

kitab Braille. Seramai **64** murid **OKU** lulus **Peperiksaan Sijil Sekolah-Sekolah Rendah Ugama (SSSRU)** pada tahun **2024**, disamping penglibatan aktif mereka dalam kokurikulum keagamaan seperti Majlis Khatam Al-Quran dan program Ramadan. Profesionalisme guru turut diperkasa melalui latihan pedagogi, psikologi pendidikan dan terapi pembelajaran secara kolaboratif bersama pelbagai agensi, disokong oleh penyediaan **44 Bilik Bantuan Pembelajaran** di sekolah agama. Jumlah pelajar meningkat dari **804 orang pada 2024** kepada **918 orang pada 2025**, dibimbing oleh **92 orang guru** pada tahun 2025.

- e) Pencapaian atlet OKU terus mengharumkan nama negara. Dalam 2nd SEA Deaf Games 2025 di Jakarta, atlet negara OKU pendengaran meraih **3 pingat gangsa**. Manakala dalam Para Swimming Circuit di Kuala Lumpur tahun ini, atlet para renang, **Awang Mohd Danial Hakim bin Harjimmey**, meraih **5 pingat emas dan 1 pingat perak**, di samping memecahkan beberapa rekod kebangsaan. Beliau juga telah dilantik sebagai **brand ambassador rasmi syarikat** Heidelberg Materials Butra Sdn. Bhd. **mulai 2026**, yang setentunya memberi inspirasi kepada yang lain.
 - f) Inisiatif **Projek Gelang SafeLink** turut diperkenalkan pada 18 Ogos 2025, hasil kolaborasi Kumpulan **Together 4 Autism (T4A)** di bawah Program Pembangunan Eksekutif bagi Pegawai Pengurusan Pertengahan ke-36 (EDPMMO-36), dengan sokongan beberapa agensi swasta. Gelang keselamatan untuk kanak-kanak autisme ini dilengkapi kod QR, mengandungi maklumat kecemasan, sebagai langkah proaktif untuk memastikan keselamatan dan kesejahteraan mereka.
 - g) Pada tahun ini, **Majlis Kesejahteraan Orang Kelainan Upaya (MKOKU)** menerima **Anugerah ASEAN Outstanding Social Welfare and Development Awards (AOSWADA)** bagi kategori pertubuhan bukan Kerajaan (NGO), manakala **An-Nur Harapan (UnikLearn)** menerima anugerah bagi kategori sektor swasta, disampaikan semasa Mesyuarat Menteri-Menteri ASEAN mengenai Kebajikan dan Pembangunan Sosial ke-12 pada Ogos 2025.
 - h) **Persidangan Kebangsaan OKU Kali Pertama** juga telah diadakan Januari tahun ini oleh **MKOKU, Kementerian Kebudayaan, Belia dan Sukan (KKBS) dan Majlis Belia Brunei**, melibatkan lebih 300 pembuat dasar, NGO dan pakar antarabangsa termasuk **ASEAN Disability Forum**. Hasil dialog ini menjadi asas kepada penyediaan **Pelan Tindakan Kebangsaan bagi Orang Kelainan Upaya 2025–2029**.
5. Alhamdulillah, marilah kita sama-sama menyambut Hari Antarabangsa OKU dan pada masa yang sama, sering mengingatkan antara satu sama lain untuk menghargai nilai dan sumbangan yang dicurahkan oleh golongan OKU kepada negara. Dengan segala kerendahan hati, saya dengan sukacitanya mengucapkan **“Selamat Hari Antarabangsa Orang Kelainan Upaya”** kepada semua golongan OKU di Negara Brunei Darussalam.

Amin Ya Rabbal Alamin.

“Melabur dalam masyarakat inklusif dengan memperkasakan OKU”